

四庫全書

集部

欽定四庫全書

唐詩紀事卷三十三

宋 計敏夫 撰

李吉甫

武元衡

鄭絪

獨孤良弼

獨孤授

李季何

李應

盧拱

李觀

裴度

韋同則

陳蛻

李吉甫

九日小園獨謠贈門下武相公云小園休沐暇暫與故
山期樹杪懸丹棗苔陰落紫梨舞叢新菊徧繞格古藤

垂受露紅蘭晚迎霜白薤肥上公留鳳沼冠劍俟清祠
應命端居者長慙補袞詩

武元衡

九日致齋禁省和中書李相公云齋沐限中禁家山傳
勝遊露寒潘省夜木落庾園秋蘭菊回幽步壺觴絕舊
儔位高天祿閣詞異畔牢愁孤思琴先覺馳暉水共流
明朝不相見清祀在圓丘

送唐次云都門去馬嘶灞水東流淺青槐驛路長白日

離亭晚望望煙景微草木行人遠

早秋西亭宴徐員外詩云鼎鉉辭台坐麾幢領益州曲
池連月曉橫笛滿城秋有美皇華使曾同白社遊今來
重相見偏覺艷歌愁

元衡字伯蒼元和二年為相代高崇文鎮蜀八年召還
途經百牢關題石洞詩云昔佩兵符去今持相印還天
光臨井絡春物度巴山鳥道青冥外風泉洞壑間何慙
班定遠辛苦玉門關

送柳侍御裴起居云沱江水綠波喧鳥去喬柯南浦別
離處東風蘭麝多長亭春晚婉婉層漢路蹉跎會有歸朝
日班超柰老何

又云望鄉臺上秦人去學射山中杜魄哀落日河橋千
騎別春風寂寞旆旌迴

酬嚴司空荆南見寄云金貂再入三公府玉帳連封萬
戶侯簾捲青山巫峽曉雲凝碧岫渚宮秋劉琨坐嘯風
清塞謝朓裁詩月滿樓白雪調高歌不得美人南國翠

娥愁

送張諫議赴闕云詔書前日下丹霄頭戴儒冠脫皂貂
笛怨柳營煙漠漠雲愁江館雨蕭蕭鵝鴻得路爭先翥
松桂凌霜貴後彫歸去朝端如有問玉關門外老班超

三詩韋莊
又元集

元衡善為五言好事者傳之被之管絃嘗夏夜作詩云
夜久喧暫息池臺惟月明無因駐清景日出事還生明
日遇害初八年元衡自蜀再輔政時太微犯上相歷執

法占者言今之三相皆不利始輕末重月餘李絳以足疾免明年十月李吉甫以暴疾卒至是元衡為盜所害年五十八始元衡與吉甫齊年又同日為宰相及出鎮分領楊益及吉甫再入元衡亦還吉甫先一年以元衡生月卒元衡後一年以吉甫生月卒吉甫之數若符會焉先是長安謠曰打麥麥打三三三既而旋其袖曰舞了也解者謂打麥者打麥時也麥打者謂暗中突擊也三三三謂六月三日也舞了也謂元衡之卒也

元衡卒劉禹錫作佳人怨二章云寶馬鳴珂踏曉塵魚
文七首犯華茵適來行哭里門外昨夜華堂歌舞人秉
燭朝天遂不回路人彈指望高臺墻東便是傷心地夜
夜秋螢飛去來

鄭綯

奉和武相公省中宿齋酬李相公見寄云高閣安仁省
名園廣武廬沐蘭朝太一種竹詠華胥禁靜踈鐘徹庭
開爽韻虛洪鈞齊萬物縹帙整羣書寒露滋新菊秋風

落故集同懷不同賞幽意竟何如

綢字文明善屬文所交皆天下名士憲宗初拜相默默居位四年罷為太子賓客太和中以太子太傅致仕卒綢守道寡欲所居不為烜赫事以篤實稱

綢九日懷邵二詩云十歲此辰同醉友登高各處已三年又懷林十二云情人共惆悵良友不同遊其重友如此又有九月十五日東亭望月詩云紫閣道流今不見紅樓禪客早曾聞

獨孤良弼

上巳接清明遊宴詩云上巳歡初罷清明賞又追閏年
侵舊歷令節併芳時細雨鶯飛重春風酒醞遲尋花迷
白雪看柳拆清絲淑氣如相待天和意為誰吁嗟名未
立空詠宴遊詩

良弼貞元間進士也為左司郎中又有良史者登進士
第

獨孤綬

投珠於泉詩云至道歸淳化明珠必棄捐天真來照乘
成性却沉泉不是靈蛇吐非緣合浦還岍傍隨月落波
底共星懸致遠終無脛懷貪遂息肩欲知恭儉德所寶
在惟賢

德宗多召學術之士躬自考試又制科宣政殿如稱旨
即翹足高吟偏示宰臣曰此皆朕門生也獨孤綬所司
試馴象賦及其本上上吟其句曰化之式享則必受乎
來獻物或違性斯用感於至仁上以綬為知去就故特

書第三先是代宗朝越人獻象三十有二上悉放之於山之南而綬不辱其受獻不傷其放棄故賞其知去就焉

綬舉博學宏詞吏部考當乙科子邵覆之置甲科人咨其公

李季何

立春日曉望三素雲詩云靄靄青春曙飛仙駕五雲浮雲初縹緲承蓋下氤氲薄影隨風度殊容向日分羽毛

紛共遠環珮杳猶聞靜合煙霞色遙將鸞鶴羣年年瞻
此節應許從元君

李何登貞元十一年進士第

李應

立春日曉望三素雲詩云元鳥初來日靈仙望裏分
容朝上界玉輦擁朝雲碧落流輕艷紅霓間綠文帶煙
時縹緲向斗更氤氲髣髴隨風馭超遙出曉霧茲辰三
見後希得從元君

應登貞元十一年進士第

盧拱

中元日觀法事云四孟逢秋序三元得氣中雲迎碧落
步章奏玉皇宮壇滴槐花露香飄栢子風羽衣凌縹緲
瑤轂輾虛空久慕飡霞客常悲習蓼虫青囊如可授從
此訪鴻蒙

姚合送盧拱秘書遊魏詩云官閑身自在詩儉語分明
車馬應回晚烟花滿去塵

楊巨源寄申州盧拱使君云領郡仍聞總虎貌致身還
是見男兒小船隔水催桃葉大鼓當風舞柘枝酒坐微
酣諸客倒毬場慢撥幾人隨從來樂事增詩苦莫放窻
中遠岫知

元微之自唐歸京拱時為秘書郎以詩贈樂天兼以遺
微之微之和云新識蓬山傑深交翰苑材連投珠作貫
獨和玉成堆劇敵徒相軋羸師亦自媒

李觀

字元賓以文馳聲貞元中卒於校書郎陸希聲序其文
曰退之窮老不休終不能為元賓之辭使元賓後退之
死亦不能及退之之質退之大革流弊落落有老成風
元賓則不古不今卓然自作一體激揚發越若絲竹中
有金石聲每篇得意處如健馬在御蹠蹠不能止其所
長如此

觀贈馮宿宿云寒城上秦原遊子意飄飄黑雲截萬里獵
火從中燒陰空蒸長煙殺氣獨不銷冰交石可裂風疾

山如搖時無青松心願我獨不凋

宿裴友書齋云卧君山窻下山鳥與我言清風何颼颼
松栢中夜繁久遊失歸趣宿此似故園林煙還近郊谿
月落古原稚子不待曉花間出柴門

貞元八年宏詞試中和節詔賜公卿尺詩云淑節韶光
媚皇明寵錫崇具寮頒玉尺成器幸良工豈止尋常用
將傳度量同人何不取利物亦賴其功紫翰宣殊造丹
誠厲匪躬奉之無失墜恩澤自天中

裴度

至日登樂遊園云陰律隨寒改陽和應節生祥雲觀魏
闕瑞氣映秦城驗炭論時政書雲受歲盈影移長日至
霧歛遠霄清景暖仙梅動風柔御柳傾那堪封得意空
對物華情

公出討淮西過女几山下刻石題詩後果尅期平賊其
詩云待平賊壘報天子莫指仙山示武夫由是淮蔡底
平民安生業白居易作詩二百言繼公篇之末何處畫

功業何處題詩篇麒麟高閣上女几小山前爾後多少
時四朝二十年賊骨化為土賊壘犂為田一從賊壘平
陳蔡民晏然驟軍成牛戶鬼火變人煙生子已嫁娶種
桑亦絲綿皆云公之德欲報無由緣公今在何處守都
鎮三川舊宅留永樂新居開進賢今公在何官被袞珥
貂蟬戰袍破猶在髀肉生欲圓

傍水閑行詩云閑餘何事覺身輕暫脫朝衣傍水行鷗
鳥亦知人意靜故來相近不相驚

公赴敵淮西題名華嶽廟之闕門大順中戶部侍郎司空圖以一絕紀之曰岳前大隊赴淮西從此中原息戰
髀石闕莫教苔蘚上分明認取晉公題

公貞元中作鑄劍戟為農器賦其首云皇帝之嗣位三十載寰海鏡清方隅底平駢域中盡歸力穡示天下不復用兵其後作相立殊勲致太平已見於文矣

公題南庄云野人不識中書令喚作陶家與謝家樂天有詩云陶廬僻陋那堪比謝墅幽微不足攀何似嵩峰

三十六長隨申甫作家山

樂天求馬裴贈以馬因戲云君若有心求逸足我還留
意在名姝引妾換馬之事樂天答云安石風流無奈何
欲將赤驥換青娥不辭便送東山去臨老何人與唱歌
貞元八年公試宏詞有司以中和節詔賜公卿尺為題
公詩曰陽和行慶賜尺度及羣公荷寵承佳節傾心立
大中短長思合制遠近貴攸同共仰財成德將酬分寸
功作程施有政垂範播無窮願續南山壽千春奉聖躬

中書即事云有意効承平無功益聖明灰心緣忍事霜
髮為論兵道直身還在恩深命轉輕鹽梅非擬議葵藿
是平生白日長懸照蒼蠅謾發聲嵩陽舊田地終使謝
歸耕

唐趙璘云晉公貞元中作鑄劍戟為農器賦云觀其氣
槩已有立殊勲致太平之意進士李為作淚及輕薄暗
小四賦李賀作樂府多屬意花草蜂蝶之間二子終不
遠大文字之作可以定相命優劣矣


韋同則

仲月賞花云梅花似雪柳含煙南地風光臘月前把酒
且須判却醉風流何必待歌筵

同則建中時詩人也有韋同正者登建中四年第

陳蛻

蛻肅代間人賦長安十五詠自序云蛻生長江淮間以
詩句從賦僅十餘年矣今我后撫運澤及四夷蛻復得
為太平人其華清宮詩有夢裏換春秋之句



唐詩紀事卷三十三

欽定四庫全書

集部

唐詩紀事卷三十四至
六

詳校官監察御史臣沈孫璉

主事銜臣徐以坤覆勘

覆校官中書臣呂雲棟

校對官原任典簿臣郭祚熾

謄錄監生臣劉紳

欽定四庫全書

唐詩紀事卷三十四

宋 計敏夫 撰

韓愈

張籍

史延

丁澤

樊宗師

李道昌

韓愈

司空圖云金之精麤效其聲皆可辨也豈清於磬而渾
於鍾哉然則作者為文為詩才格亦可見豈當善於彼
不善於此耶愚觀文人之為詩詩人之為文始皆繫其

所尚所尚既專則搜研愈至故能銜其功於不朽亦猶力巨而闢者所持之器各異而皆能濟勝以為勦敵也愚嘗覽韓吏部歌詩累百首其驅駕氣勢若掀雷挾電撐挾於天地之根物狀其變不得鼓舞而徇其呼吸也其次皇甫祠部文集外所作亦為道逸非無意於深密蓋或未遑耳今於華下方得柳詩味其探搜之致亦深遠矣俾其窮而克壽抗精極意則固非瑣瑣者輕可擬議其優劣又嘗觀杜子美祭太尉房公文李太白佛寺

碑贊宏拔清厲乃其歌詩也張曲江五言沈鬱亦其文
筆也豈相傷哉噫後之學者褊淺片詞隻句未能自辨
已側目相詆訾矣痛哉因題柳集之末庶俾後之詮評
者罔惑偏說以蓋其全工

洛邑得休告華山窮絕陁倚巖睨海眼引袖拂天星日
駕此迴輶金神所司刑泉紳拖脩白石劒攢高青磴蘚
漣拳跼梯飈颭伶俜悔狂已咋指垂誠仍鐫銘退之答
張徹詩也李肇載登華事信有之沈顏遺肇書謂退之

託此以悲世人登高而不知止且示誡焉皇甫湜作韓先生墓志云長慶四年八月昌黎韓先生既以疾免吏部侍郎書諭湜曰死能令我躬所以不隨世磨滅者惟子以為囑其年十二月丙子遂薨明年其孤昶使奉功緒之錄繼訃以至三月癸酉葬河陽乃哭而叙其墓其詳將揭之於神道碑云先生諱愈字退之後魏安桓王茂六代孫祖朝散大夫桂州長史諱叡素父秘書郎贈尚書左僕射諱仲卿先生七歲好學言出成文及冠恣

為書以傳聖人之道人始未信既發不掩聲震業光眾
方驚爆而萃排之乘危將顛不懈益張卒大信於天下
先生之作無圓無方至是歸工挾經之心執聖之權尚
友作者跂邪觝異以扶孔氏存皇之極人知人罪非我
計茹古涵今無有端涯渾渾灝灝不可窺校及其酣放
豪曲快字凌紙恠發鯨鏗春麗驚耀天下然而栗密竊
耿章妥句適精能之至入神出天嗚呼極矣後人無以
加之矣姬氏以來一人而已矣始先生以進士仕歷官

二十有七其為御史尚書郎中中書舍人前後三貶皆以疏陳治事廷議不隨為非常惋佛老法潰聖人之隄乃唱而築之及為刑部侍郎遂章言憲宗迎佛骨非是任為身耻上怒天子先生處之安然就貶八千里海上嗚呼古所謂非苟知之亦允蹈之者耶吳元濟反吏兵久遁無功國涸將疑眾懼恟恟先生以右庶子兼御史中丞行軍司馬宰相軍出潼關請先乘遽至汴感說都統師乘遂和卒擒元濟王庭湊反圍牛元翼於深救兵

十萬望不敢前詔擇庭臣往諭衆慄縮先生勇行元微
之言於上曰韓愈可惜穆宗悔馳詔無徑入先生曰止
君之仁死臣之義遂至賊營麾其衆責之賊恒汗伏地
乃出元翼春秋美臧孫辰告糴於齊以為急病校其難
易孰為宜褒嗚呼先生真古所謂大臣者耶選拜京兆
尹歛禁軍帖旱糴獻鬻倖臣之銚再為吏部侍郎薨年
五十七贈禮部尚書先生與人洞朗軒闥不施戟級族
姻友舊不自立者必待我然後衣食嫁娶喪葬平居雖

寢食未嘗去書怠以為枕食以飴口講評孜孜以磨諸
生恐不貌美游以詼笑嘯歌使皆醉義忘歸嗚呼可謂
樂易君子鉅人者矣夫人高平郡君范陽盧氏孤前進
士昶壻左拾遺李漢壻集賢校理樊宗懿次女許嫁陳
氏三女未笄銘曰維天有道在我先生萬頸胥延坐廟
以行令望絕耶痾此四方惟聖有文垂微歲千先生起
之焯役於前曠義滂仁耿照克天有如先生而合且年
按我章書經紀大環陰不時施昌極後昆噫嘻永歸知

心之悲

鬻王憂反
吟其禁反

喚起窓前曙催歸日未西無心花裏鳥更與盡情啼乃
二禽名也喚起聲如絡緯圓轉清亮偏鳴於春曉江南
謂之春喚催歸子規也

謹按公生於代宗大歷三年戊申

德宗貞元八年壬申是歲公登第年二十五

十一年乙亥上宰相三書

時趙璟賈耽盧邁為相是
歲欲相延齡陽城諫止

五

月東歸作感二鳥賦其末云幸年歲之未暮庶無羨於

斯類時年二十八

十三年丁丑從董晉辟為汴宋穎毫觀察推官

十五年己卯二月晉公薨公隨晉喪歸既出四日宣武軍亂殺行軍司馬陸長源公作汴州亂二章云汴州城門朝不開天狗墮地聲如雷健兒爭誘殺留後連屋累棟燒成灰諸侯咫尺不能救孤士何者自興衰又曰母從子走者為誰大夫夫人留後兒

長源也

昨日乘車騎大

馬坐者為趨乘者下廟堂不肯用干戈嗚呼奈汝母子

何

十六年庚辰依徐州武寧軍節度張建封

十九年癸未拜監察御史上書論宮市貶連州陽山令
時有送浮屠文暢孟東野序

二十年甲申移江陵法曹參軍途中作詩寄三翰林未
幾以四門博士召

二十一年乙酉正月德宗崩順宗立改元永貞韋叔誼
王叔文等用事又謀奪中官兵制天下之命是年八月

皇太子即位帝自稱太上皇貶叔誼叔文等公作永貞
行云君不見太皇諒陰未出命小人乘時偷國柄北軍
百萬虎與貔天子自將非他師一朝奪印付私黨凜凜
朝士何能為狐鳴梟噪爭署置睨閃跳踉相舐媚夜作
詔書朝拜官超資越序曾無難公然白日受賄賂火齊
磊落堆金盤元臣故老不敢語晝卧涕泣何沈瀾董賢
三公誰復惜侯景九錫行可歎國家功高德且厚天位
未許庸夫干嗣皇卓犖信英主文如太宗武高祖膺圖

受禪登明堂共流幽州鮫死羽四門肅穆賢俊登數君
匪親豈其朋郎官清要為世稱荒郡迫野嗟可矜湖波
連天日相騰蠻俗生梗瘴癘蒸江氛嶺複昏若凝一蛇
兩頭見未曾怪鳥爭鳴令人憎蠱虫羣飛夜撲燈雄虺
毒螫墮股肱食中置藥肝心崩左右使令詐難憑慎勿
浪信當兢兢吾嘗同僚情可勝具書自見非妄徵嗟爾
既往宜為懲是歲又作五歲年二十八

憲宗元和元年丙戌權知國子博士作釋言

二年丁亥是歲作元和聖德詩

三年分司東都始宰相鄭公索公文公獻之有譖公者
遂作釋言至是不自安乃求分司

四年是歲真為國子博士改分司都官員外郎

五年為河南令是歲效玉川子月蝕詩

六年入拜職方員外郎時有送窮文寄盧仝詩坐論華
陰令柳澗事復為博士作進學解執政竒其才改比部
郎中史館修撰轉考功郎中修撰如故數月以考功知

制詰論討蔡事與裴度議合月滿遷中書舍人賜緋魚

袋後卒以謗語改太子右庶子

自六年至十一年也

十二年丁酉裴度軍慰淮西秦公行軍司馬有從軍泊
途中諸篇其間次潼關寄張十二使君詩云荆山已去
華山來日照潼關四扇開刺史莫辭迎候遠相公新破
蔡州迴又次潼關上都統相公云暫辭堂印執兵權盡
管諸軍破賊年冠蓋相望催入相待將功德格皇天又
桃林夜賀晉公云西來騎火照山紅夜宿桃林臘月中

來把命珪蕪相印一時重疊賞元功數篇皆有與旨元
濟平遷刑部侍郎

十四年正月表乞燒佛骨疏入貶潮州刺史有次藍闕
示姪孫湘詩云一封朝奏九重天夕貶潮陽路八千欲
為聖明除弊事豈將衰朽計殘年雲橫秦嶺家何在雪
擁藍關馬不前知汝遠來應有意好收吾骨瘴江邊是
歲十月量移袁州刺史酬張韶州詩云明時遠逐事何
如遇赦移官罪未除北望詎令隨塞鴈南遷纔免葬江

魚將經貴郡須留客先惠高文謝起予暫欲繫船韶石
下上賓虞舜整冠裾又留別張使君云來往再逢梅柳
新別離一醉綺羅春久欽江總文才妙自歎虞翻骨相
貧鳴笛急吹催落日清歌緩送感行人已知奏課當徵
拜那復淹留詠白蘋

十五年庚子至袁州是歲正月憲宗崩穆宗立召為國
子祭酒長慶元年辛丑轉兵部侍郎七月成德軍大將
王廷湊殺田洪正

二年公奉命宣撫鎮州時裴度為幽鎮招撫使公有行
次承天營酬裴公詩云竄逐三年海上歸逢公復此着
征衣旋吟佳句還鞭馬恨不身先去鳥飛是歲四月廷
湊解深州之圍牛元翼奔歸京師六月裴度罷

三月相
六月罷

李逢吉為相始公有和裴公感恩言志詩云文武功成
後居為百辟師林園窮勝事鐘鼓樂清時擺落遺高論
雕鑿出小詩自然無不可范蠡爾其誰又和裴公回朝
見寄云蠱瘁年將久公今始暫閑事隨憂共減詩與酒

俱還放意機衡外收身矢石間秋臺風日迫正好看前
山時牛李黨熾裴介其間累遭謗讟故公詩有高蹈之
語是歲拜京兆尹

三年罷京兆尹為兵部侍郎尋拜吏部侍郎

四年甲辰有南溪始泛詩是歲公以病罷吏侍故有餘
年諒無幾休日愴已晚自是病使然非由取高蹇又有
足弱不能步自宜收朝蹟之句十二月二日卒於靖安
里年五十七

張籍

短歌行云青天蕩蕩高且虛上有白日無根株流光暫
出還入地使我年少不須臾與君相逢勿寂寞衰老不
復如今樂玉卮盛酒置君前再拜願君千萬年

節婦吟寄東平李司空云君知妾有夫贈妾雙明珠感
君纏綿意繫在紅羅襦妾家高樓連苑起良人執戟光
明裏知君用心如日月事夫誓擬同生死還君明珠雙
淚垂何不相逢未嫁時

白紵歌云皎皎白紵白且鮮將作春衣稱少年裁縫長
短不能定自持刀尺向姑前復恐蘭膏污纖指常遣傍
人收墮珥衣裳着時寒食下還把玉鞭鞭白馬

將軍行云彈箏峽東有邊塵天子擇日拜將軍蓬萊殿
前賜六纛還領禁兵為部曲當朝受詔不辭家夜向咸
陽原上宿戰車彭彭旌陽動三十六軍聲上隴隴頭戰
勝夜亦行分兵處處收舊城邊兵殺盡陰磧暮擾擾惟
有牛羊聲邊人親戚曾戰歿今逐官軍收舊骨磧西行

見萬里空樂府獨奏將軍功

白頭吟云請君膝上琴彈我白頭吟憶昔君前嬌笑語
兩情宛轉如縈素宮中為我起高樓更開花池種芳樹
春天百草秋始衰棄我不待白頭時羅襦玉珥色未暗
今朝已道不相宜揚州青銅作明鏡暗中持照不見影
人心迴互自無窮眼前好惡那能定君恩已去若再返
菖蒲花青月長滿

籍樂府詞清麗深婉五言律詩亦平澹可喜七言詩則

質多文少人才各自有宜不可強文飾也文昌有謝裴
司空馬詩云乍離華厩移蹄澁初到貧家舉眼驚此馬
乃是一遲鈍不能行而多驚詩人之微而顯亦少其比
寒食內宴云朝光瑞氣滿宮樓彩燾魚龍四面稠廊下
御厨分冷食殿前香騎逐飛毬千官盡醉猶教坐百戲
皆呈未放休共喜拜恩侵夜出金吾不敢問行由

籍宿江上詩云楚驛南渡口夜深來客稀月明見潮上
江靜覺鷗飛旅次今已遠此行殊未歸離家久無信又

聽搗寒衣或云劉長卿餘干旅舍云搖落暮天迥丹楓
霜葉稀孤城向水閉獨鳥背人飛渡口月初上隣家漁
未歸鄉心正欲絕何處搗征衣槩相類也

籍字文昌和州人歷水部外郎終主客郎中

籍答鄱陽客云江臯歲暮相逢地黃葉霜前半夏枝子
夜吟詩向松桂心中萬事喜君知乃知藥名詩自元和
間已為之矣

蕃漢斷消息死生長別離句長於送人處憶得別家時

句
流光漸出還入地使我年少不須更
句
採樵莫採松
與栢松栢生枝直且堅與爾作屋成家宅
句
右張為取
為主客圖

退之送東野序云唐有天下陳子昂蘇元明元結李白
杜甫李觀皆以其所能鳴其存而在下者孟郊東野始
以其詩鳴其高出晉魏不懈而及於古其他浸淫乎漢
氏矣從吾遊者李翱張籍其尤也三子者之鳴信善鳴
矣抑不知天將和其聲使鳴國家之盛耶抑將窮餓其

身思愁其心腸而使自鳴其不幸耶三子者之命則存乎天矣其在上也奚以喜其在下也奚以悲

籍詩善叙事如拜豐陵云歲朝園寢遣公卿學省班中亦攝行身逐陵官齊再拜手持木鐸叩三聲寒更報點來三殿曉炬分行照栢城却下龍門看漸遠金峰高處日初晴

送令狐尚書東都留守云朝廷重寄在關東共說從前選上公勲業新成大梁鎮恩榮便賞洛陽宮行香暫出

天橋上巡禮常過紫殿中每領羣官拜章表半開門仗
日曛曛

田司空入朝云西來將相望蕪雄不與諸軍覲禮同早
變山東知順命新收濟上立殊功朝官叙謁趨門外恩
使宣迎滿路中間闔曉開銅漏盡身當受冊大明宮

送汀州源使君云曾成趙北歸官計因拜王門最好官
為郡暫辭雙鳳闕全家遠過九龍灘山鄉只有輸蕉戶
水鎮應多養鴨欄地僻尋常來客少刺桐花發共誰看

送李僕射愬赴鎮鳳翔云由來勲業屬英雄兄弟連雲
列位同先入賊城擒惡首盡封筦庫讓元公旌幢獨繼
家聲外竹帛新添國史中天子欲收秦隴地故交移鎮
古扶風

送裴相公鎮太原云盛德雄名遠近知功高先乞守藩
維銜恩暫遣分龍節署勅還同在鳳池天子親臨樓上
送朝官齊出道邊辭明年塞北諸蕃落應赴生祠請立
碑

白樂天讀籍詩集云張公何為者業文三十春尤攻樂府詞舉代少其人姚合讀籍詩有詩云妙絕江南曲淒涼怨女詩古風無敵手新語足人知

史延

清明賜新火云上苑連侯第清明及暮春九天初改火萬井屬良辰頒賜恩踰洽承時慶亦均翠煙和柳嫩紅焰出花新寵命尊三老祥光燭萬人太平當此日空腹賀陶鈞

大歷九年留守蔣渙試進士於東都延登第

丁澤

龜負圖詩云天意將垂象神龜出負圖五方行有配八卦義寧孤作瑞旌君德披文叶帝謨乘流喜得路逢聖
幸存軀蓮葉池通泛桃花水自浮還尋九江去安肯曳
泥途

澤大歷十年試龜負圖詩為東都第一

樊宗師

蜀綿州越王樓詩序云綿之城帝獨獵獵明威彌石峭
馳涪瀨左陵凌紅蕖簪天地送行癸壬且掬跼踖於西
北蟠紅顏青越王正故為樓重軒疊飛門牕蒙傘蹇蹇
子始登謂日月昏曉可窺其背雷電合風雲遇霜辛露
酸星辰介行鬼神變化草木顯繡髻銜蓑芰皆可察極
既縈視其江帶又極視其土崗斷暴遠近山嶮嶮若閬
之東皇天原開見荆山我其黃河矚然為曲直淚雨落
不可掩因口其心曰無害若其目果星星過歸尚悲不

能解重為詩以釋益不可顧謂郡中諸君能無有意綴以華艷其念蓄云

危樓倚天門如闔星辰宮榱題薄龍怪洄洄繞雷風徂
秋試登臨大靄屯喬空不見西北路考懷益雕窮石瀨
薄濺濺土山杳穹穹昔人創為逝所適酖顏紅今我茲
之來猶校成歲功輟田植科畝游圃歌芳叢地財無叢
厚人室安取豐既乏富庶能千萬慙文翁

宗師字紹述襄陽節度使澤之子韓退之誌其墓曰為

文必出於已不襲蹈前人一言一句何其難也必出於
仁義其富若生蓄萬物必具海涵地負放恣縱橫無所
統紀然而不煩於繩削而自合也嗚呼紹述於斯術其
可謂至於斯極者矣

李道昌

道昌唐大歷十三年為蘇州觀察使一日郡城外虎邱
山有鬼題詩二首隱于石壁之上云青松多悲風蕭蕭
聲且哀南山接幽壠幽壠空崔嵬白日徒昭昭不照長

夜臺雖知生者樂魂魄安能迴况復念所親慟哭心肝
摧慟哭更何言哀哉復哀哉又曰神仙不可學形化空
遊魂白日非我朝青松為我門雖復隔幽顯猶知念子
孫何以遣悲惋萬物歸其根寄語世上人莫厭臨芳樽
莊生問枯骨王樂成虛言道昌異其事遂具奏聞准勅
令致祭道昌為其文曰嗚呼萬古邛陵化無再出君若
何人能閑詩筆何代而亡誰人子姪曾作何官是誰仙
室寂寞夜臺悲乎白日不向紙上石中隱出桃源三月

深草垂楊黃鶯百轉猿聲斷腸不題姓字寧辨賢良嗚
呼哀哉嘆昔先賢空傳經史終無再還青松嶺上嵯峨
碧山大唐正業已記詩言痛復痛兮何處賓悲復悲兮
萬古墳能作詩兮動天地聲悲怨兮淚霑巾感我皇兮
列清酌願當生兮事明君是時祭後經數日再有詩一
絕於石云幽冥雖異路平昔忝攻文欲知潛昧處山北
兩孤墳後於寺山之地果有二墳極高大荆榛藂茂詢
諸耆艾竟不知何姓氏至今猶存

皮日休和云念爾風雅魂幽咽猶能文空令傷魂鳥啼
破山邊墳

陸龜蒙和云靈氣猶不死尚能成綺文如何孤窆裏猶
自讀三墳

唐詩紀事卷三十四

欽定四庫全書

唐詩紀事卷三十五

宋 計敏夫 撰

陸暢

崔元翰

張建封

皇甫湜

李翱

麴信陵

孟郊

盧仝

劉义

楊巨源

陳羽

王履正

彭伉

辛弘智

歐陽詹

焦郁

袁高

陸暢

暢字達夫吳郡人韋臯雅所厚禮天寶時李白為蜀道

難以斥嚴武暢更為蜀道易以美臯

鄭注亂以前少尹與注計事斬注首

嘗吟對雪落句云天人寧底巧剪水作花飛

又山齋翫月云野性平生唯好月新晴半夜覩嬋娟起
來自擘書牕破教漏清光落枕前

又經崔諫議林亭云蟬噪入雲樹風開無主花初為江
西王仲舒從事拂衣去後遇雲陽公主下降百僚舉暢
為儋相詩皆頃刻而成詠簾曰勞將素手捲蝦鬚瓊室

流光更綴珠玉漏報來過半夜可憐潘岳立躊躇詠行
障曰碧玉為竿丁字成鴛鴦繡帶短長聲強遮天上花
顏色不隔雲中笑語聲

詔作催粧五言曰雲安公主貴出嫁五侯家天母親調
粉日兄憐賜花催鋪百子帳待障七香車借問粧成未
東方欲曉霞內人以其吳音捷才以詩嘲之云十二層
樓倚翠空鳳鸞相對立梧桐雙成走報監門衛莫使吳
飲入漢宮

或曰宋若
蘭姊妹作

陸酬曰粉面仙郎選世朝偶逢神

女學吹簫須教翡翠聞王母不奈烏鳶噪鵲橋六宮大
咍別賜宮錦楞伽瓶唾盂各一

暢謁韋臯作蜀道易詩云蜀道易易於履平地臯大喜
臯薨朝廷欲繩其既往之事復閱先進兵器上皆刻定
秦二字不相與者因造成罪名暢上疏理之曰臣在蜀
日見造所進兵器定秦者匠名也由此得釋

段成式云暢江東人語多差誤人以為劇語初娶董溪
女每旦婢進澡豆暢輒沃水服之或曰君為貴門女婿

幾多樂事陸曰貴門苦禮法俾予食辣麪殆不可過
張籍贈暢云共踏長安街裏塵吳州獨作未歸身胥門
舊宅今誰住君過西塘與問人

趙麟儀質瑣陋成名後以薛能為儔相能詩曰第一莫
教蛛太過緣人衣帶上人頭又火爐床上平身立便與
夫人作鏡臺或曰暢美而能罵

崔元翰

名鵬以字行舉進士年五十矣禮侍于邵以其文擢異

等曰後當司詔令實叅秉政引知制誥其訓詞溫厚有
典誥風以剛褊罷為比部郎中卒晚年方取應咸為首
捷京兆解頭禮部狀頭宏詞勅制科三等勅頭權德輿
謂其文如黃鐘玉磬琮璧琬琰奏於懸間列在西序其
章者雖漢廷諸公無以加也然清剛而不能容物介特
寡徒晚達中廢斯亦命之所賦也

清明卧病不得遊開元寺詩云山色入層城鐘聲臨複
岫乘間息邊事探異憐春候曲閣下重堦迴廊遙對雷

石間花遍落草上雲時覆鑽火見樵人飲泉逢野獸道
情親法侶時望登朝右執憲糾姦邪刊書正訛謬茂才
當時選公子生人秀贈答繼篇章歡娛重用舊垂簾獨
衰疾擊缶酬金奏

奉和聖製重陽日百寮曲江宴示懷詩云偶聖覩昌期
受恩慙弱質幸逢良宴會況是清秋日遠岫對壺觴沉
瀾映簪紱魚羔備豐膳象鳳調鳴律薄劣廁英髦歡娛
忘衰疾平臯行鴈下曲渚雙鳬出沙岼菊開花霜枝果

垂實天文見成象帝念資勤恤探道得玄珠齋心居特
室豈如橫汾唱其事徒矯逸

張建封

字本立南陽人少喜文章尚氣節貞元四年拜御史大
夫徐泗濠節度使十三年來朝帝不待日召見延英殿
朝會赴大夫班以示殊寵建封賦朝天行以獻還鎮帝
賦詩餞之又賜所持鞭曰卿節誼歲寒故用此為況建
封又賦詩自警勵十六年卒許孟容韓愈皆奏置幕府

權載之叙其文曰公贊勲伐表邛隴銘器叙事放言詣理皆與作者方駕而歌詩特優有仲宣之氣質越石之清拔如雪濤溟漲浩漾無際而天球夜光往往在焉其入覲也獻朝天行一篇因喜氣以攄肝膈覽其詞者見公之心焉其還鎮也德宗皇帝紆天文以送別湛恩異倫輝動中朝至於內庭錫宴君唱臣和皆酌六義之英而為一時之盛夫文之病也或牽拘而不能騁或犇放而不自還公則裁成心匠揮斥細故英華感慨卓爾其闕大析

理研幾泊然其精微全才逸氣與勲力相直盡在是矣

皇甫湜

湜字持正睦州新安人擢第為陸渾尉仕至工部郎中使酒
數忤同省求分司東都留守裴度辟為判官樂天哭皇甫
郎中云志業過玄晏詞華似禰衡多才非福祿薄命是聰
明不得人間壽還留身後名涉江文一首便可敵公卿

李翱

翱刺史朗州贈藥山高僧惟儼詩云練得身形似鶴形

千株松下兩函經我來問道無餘說雲在青霄水在鉞
再贈詩曰選得幽居愜野情終年無送亦無迎有時直
上孤峰頂月下披雲嘯一聲

唐時文人李習之不能為詩韓吏部集有習之兩句云
前之巨灼灼此去信悠悠殊無可取鄭州嘗掘地得刺
史李翱戲贈詩云縣君愛塿渠遶水恣行遊鄙性樂山
野掘地便成溝兩岍植芳草中間漾清流所尚既不同
塿鑿各自修從他後人見景趣誰為幽此自一李翱非

習之也唐書習之傳亦不記為鄭州王深甫編次習之集乃收入此詩

翺在潭州席上有舞柘枝者顏色憂悴殷堯藩侍御當筵贈詩曰姑蘇太守青娥女流落長沙舞柘枝滿坐繡衣皆不識可憐紅臉淚雙垂翺詰其事乃姑蘇臺韋中

丞愛姬所生之女也

夏卿之裔
正卿之姪

曰妾以昆弟夭折委身

樂部耻辱先人言訖涕咽情不能堪亞相為之吁嘆且曰吾韋族姻舊連命更其舞服飾以桂襦延與韓夫人

相見

夫人吏部之子

顧其言語清楚宛有冠蓋風儀遂於賓榻

中選士而嫁之舒元興侍郎聞之自京馳詩曰湘江舞
罷忽成悲便脫蠻靴出絳幃誰是蔡邕琴酒客魏公懷
舊嫁文姬

習之為朗州刺史入為禮部郎中出刺廬州入為中書
舍人歷遷桂管湖南觀察山南東道節度其與僧惟儼
詩及其女識廬儲登第事皆習之也然習之學韓愈者
其與藥山僧詩是非未可知也歸妹於楊嗣復歸女於

盧求鄭亞杜審權故携畋讓能皆習之之甥皆為宰相
云其在鄭州者非習之也

麴信陵

信陵貞元元年進士為舒州望江令卒有吳門送客詩
云亂山吳苑外臨水讓王祠素是傷情處春非送客時
不須愁落日且願駐青絲千里會應到一罇誰共持
信陵移居洞庭詩云重林將疊嶂此處可逃秦水隔人
間世花開洞裏春荷鋤分地利縱酒樂天真萬事更何

有吾今已外身

白樂天感遇詩云我聞望江縣麴令撫惇嫠在官有仁
政名不聞京師身歿欲歸葬百姓遮路岐攀轅不得去
留葬此江湄至今道有名男女涕皆垂無人立碑碣唯
有邑人知

孟郊

李翱薦郊於張建封云茲有平昌孟郊正士也伏聞執
事舊知之郊為五言詩自前漢李都尉蘇屬國及建安

諸子南朝二謝郊能兼其體而有之李觀薦郊於梁肅
補闕書曰郊之五言詩其有高處在古無上其有平處
下顧兩謝韓愈送郊詩曰作詩三百首杳默咸池音彼
二子皆言知也豈欺天下之人哉郊窮餓不得安養其
親周天下無所遇作詩曰食齋腸亦苦強歌聲無歡出
門即有礙誰謂天地寬其窮也甚矣凡賢人奇士自以
所負不苟合於世是以雖見之難得而知也見而不能
知其賢如勿見而已矣知其賢而不能用如勿知其賢

而已矣用而不能盡其才如勿用而已矣盡其才而容
讒人之所間者如勿盡其才而已矣故見賢而能知知
而能用用而能盡其才而不容讒人之所間者天下一
人而已矣郊下第詩曰棄置復棄置情如刀劍傷又再
下第詩曰兩度長安陌空將淚見花而後及第有詩曰
昔人齷齪不足嗟今朝曠蕩恩無涯青春得意馬蹄疾
一日看盡長安花一日之間花即看盡何其速也果不
達

韋莊奏請追贈十餘人其一孟郊字東野尚古風詩與李光韓退之為友貞元十二年及第佐徐州張建封幕卒私諡曰貞耀先生

賈島詩曰身歿聲名在多應萬古傳寡妻無子息破宅帶林泉塚近登山道詩隨過海船故人相弔處斜日下寒天

郊字東野湖州人年五十擢調溧陽尉鄭餘慶為東都留守表為水陸運判官鎮興元表為叅謀卒

退之答郊詩云規模背時利文字覩天巧人皆餘酒肉
子獨不得飽纔春思已亂始秋悲又攪朝餐動及午夜
諷常至卯名聲暫羶腥腸肚鎮煎炒古心雖自鞭世路
終難拗弱拒喜張臂猛挈閑縮爪見倒誰肯扶從嗔我
須齧張為取郊青山輾為塵白日無閑人食齋腸亦苦
強歌聲無歡欲知萬里情曉卧半床月等句以為清奇
僻苦主遊子吟云慈母手中線遊子身上衣臨行密密
縫意恐遲遲歸誰將寸草心報得三春輝

烈女操云梧桐相待老鴛鴦會雙死正女貴徇夫捨生
亦如此波瀾誓不起妾心井中水

天寒色青蒼北風叫枯桑厚冰無裂文短日有冷光敲
石不得火壯陰奪正陽苦調更何言久吟成此章此郊
苦寒吟也或曰郊島善言貧此詩與島詩云卧聞西牀
琴凍折兩三絃鬢邊雖有絲不堪織寒衣正相侔矣
楚怨云秋入楚江水獨照汨羅魂手把茱荷泣意愁珠
淚翻九門不可入一犬吠千門

塘下行云塘邊日欲斜年少早還家徒將白羽扇調妾
木蘭花不是城頭樹那棲來去鴟

臨池曲云池中春荷葉如帶紫菱成角蓮子大羅裙蟬
鬢倚迎風雙雙伯勞飛向東

偷詩之作餓犬齧枯骨自喫饑饉涎今文與古文各各
稱可憐亦如嬰兒食餽桃口旋旋惟有一點味豈見逃
景延繩床獨坐翁默覽有所傳終當罷文字別著逍遙
篇從來文字淨君子不以賢

贈別崔純亮云食齋腸亦苦強歌聲無歡出門即有礙
誰謂天地寬有礙非遐方長安大道傍小人智慮險平
地生太行鏡破不改光蘭死不改香始知君子心交久
道益彰君心與我懷離別俱迴遑譬如浸蘖泉流苦日
已長忍泣目易衰忍憂形易傷項籍豈不壯賈生豈不
良當其失意時涕泗各滿裳古人勸加飧此飧難自強
一飧九祝噎一嗟十斷腸況是兒女怨怨氣凌彼蒼彼
蒼若有知白日下清霜今朝始驚呼白日空茫茫

落第云曉月難為光愁人難為腸誰言春物榮獨見花
上霜鵑鶚失勢病鷓鴣假翼翔棄置復棄置情如刀劍
傷

再下第云一夕九起嗟夢短不到家兩度長安陌空將
淚見花

盧仝

有所思云當時我醉美人家美人顏色嬌如花今日美
人棄我去青樓珠箔天之涯娟娟常娥月三五二八盈

又缺翠眉蟬鬢生別離一望不見心斷絕心斷絕幾千
里夢中醉卧巫山雲覺來淚滴湘江水兩岼花木深美
人不見愁人心含愁更奏綠綺琴調高絃絕無知音美
人兮美人不知為暮雨兮為朝雲相思一夜梅花發忽
到窻前疑是君

樓上女曲云誰家女兒樓上頭指揮婢子掛簾鈎林花
撩亂心之愁卷却羅袖彈箜篌箜篌歷亂五六絃羅袖
掩面啼向天相思絃斷情不斷落花紛紛心欲穿心欲

穿憑欄杆相憶柳條線相思錦帳寒直緣感君恩愛一
迴顧使我雙淚長珊珊我有嬌靨待君笑我有嬌蛾待
君掃鶯花爛熳君不來及至君來花已老心腸寸斷誰
得知玉階羃歷生青草

秋夢行云客行一夜秋風起客夢南遊渡湘水湘水冷
泠徹底清二妃怨處無限情娥皇不語啓嬌靨女英目
成轉心愜長眉入鬢何連娟肌膚白玉秀且鮮徘徊共
詠東方日沉吟再理南風絃聲斷續思綿綿中含幽意

兩不宣慙懃纖手警破夢中霄寂寞心悽然心悽然腸
亦絕寐不寐兮玉枕寒夜深夜兮霜似雪鏡中不見雙
翠眉臺前空掛纖纖月纖纖月盈復缺娟娟似眉意難
訣願此眉兮如此月萬里萬里光不滅

全居東都退之為河南令愛其詩厚禮之自號玉川子
嘗為月蝕詩譏切元和朋黨

月蝕詩云新天子即位五年歲次庚寅斗柄插子律調
黃鍾森森萬木夜殭立寒氣冱冱頑無風爛銀盤從海

底出來照我草屋東天色紺滑凝不流水光交貫寒瞳
朧初疑白蓮花浮出龍王宮八月十五夜此並不可雙
此時恠事發有物吞食來輪如壯士斧斫壞桂似雪山
風拉摧百鍊鏡照見膽平地埋寒灰火龍珠飛出腦却
入蚌蛤胎摧輪破壁眼看盡當天一搭如焰煤磨蹤滅
跡須臾間便似萬古不可開不料至神物有此大狼狽
星如撥沙出爭頭事光大奴婢炷暗燈揜烏感切莢如玳
瑁今夜吐喙長如虹孔隙千道射戶外玉川子涕泗下

中庭獨自行念此日月者太陰太陽精皇天要識物日月乃化生走天汲汲勞四體與天作眼行光明此眼不自保天公行道何由行吾見陰陽家有說望日蝕月月光滅朔月掩日日虧缺兩眼不相攻此說吾不容又孔子師老子云五色令人目盲吾恐天似人好色即喪明幸且非春晴萬物不嬌榮青山破瓦色渌水冰崢嶸花枯無女艷鳥死沉歌聲頑冬何所好偏使一目盲傳說古老說月蝕蝦蟆精徑圍千里入汝腹汝此癡骸阿誰

生何從海窟來便解緣青冥恐是睚眦間拚塞所化成
黃帝有四目帝舜重瞳明二帝懸四目四海生光輝吾
不遇二帝滉漭不可知何故瞳子上坐受虫豸欺長嗟
白兔擣靈藥恰似有意防姦非藥成滿臼不中度委任
白兔夫何為憶昔堯為天十日燒九州金鑠水銀流玉
燭妙丹砂焦六合烘為窯堯心增百憂帝見堯心憂勃
然發怒決洪流立擬沃殺九日妖天高日走沃不及但
見萬國赤子鰥鰥生魚頭此時九御導九日爭持節幡

麾幢旒駕車六九五十四頭蛟螭虬掣電九火輶汝若
蝕開齟齬輪御轡執索相爬鉤推蕩轟轡入汝喉紅鱗
燄鳥燒口快翎鬣倒側聲醜鄒撐腸拄肚礪如山邛自
可飽死更不偷不獨填饑坑亦解堯心憂恨汝當食藏
頭壓腦不肯食不當食張唇哆嘴食不休食天之眼養
逆命安得天帝請汝劉嗚呼人養虎被虎齧天昏暮得
瞽疾蝦蟇敢將天眼瞎乃知恩非類一一自作孽吾見
患眼人必索良工訣想天不異人愛眼固應一安得婦

娥氏來習扁鵲術手操春喉戈去此睛上物初見猶朦
朧既久如抹漆但恐功業成便此不吐出玉川子又涕
泗下心禱再拜額榻沙土中地上蟣虱臣全告訴帝天
皇臣心有鐵一寸可剗妖蔓癡腸上天不為臣立梯磴
臣血肉身無由飛上天揚天光先封辭付與赤心風越
排闥闔入紫宮密邇玉几前擘圻奏上臣全頑愚胸敢
死橫干天代天謀其長東方蒼龍角插戟虎拽風當心
開明堂統領三百六十鱗蟲坐理東方宮月蝕不救援

安用東方龍南方火鳥赤潑血項長尾短飛跋躩頭戴
丹冠高達拚月蝕鳥宮十二度鳥為居停主人不覺察
貪向何人家行赤口毒舌毒虫頭上喫却月不啄殺虛
貶鬼眼明突窻

上音扶
下音血

鳥罪不可雪西方攫虎立崎踦

音兀斧為牙鑿為齒偷犧牲食封豕大墓一臈固當軟美

似見不見是何道理爪牙根天不念天天若准擬北方
寒龜被蛇縛藏頭入殼如入獄蛇筋束緊束破殼寒龜
夏鼈一種味且當以其肉充臙死殼沒信處唯堪支床

脚不堪鑽灼與天卜歲星主福德官爵奉董秦忍使黔
婁生覆尸無衣巾天失眼不弔歲星胡其仁熒惑嬰鑠
翁執法大不中月明無罪過不紕食月垂年年十月朝
太微支盧謫罰何災凶土星與土性相背反養福德生
禍害到人頭上死破敗今夜月蝕安可會太白真將軍
怒激鋒銑生恒州陣斬鄺定進項骨脆甚春蔓菁天唯
兩眼失一眼將軍何處行天兵辰星任廷尉天律自主
持人命在盆底固應樂見天盲時天若不肯信試喚臯

陶鬼一問一如今宜三台文昌宮作天上紀綱環天二
十八宿磊磊尚書郎整頓排班行劍握他人將一四太
陽側一四天帝旁操斧代大匠兩手不怕傷弧矢引滿
反射人天狼呀啄明煌煌癡牛與騃女不肯勤農桑徒
勞含淫思旦夕遙相望蚩尤簸箕弄旬朔始搥天鼓鳴
璫琅枉矢能蛇行眉目森森張天狗下舐地血流何滂
滂譎險萬萬黨構架何可當眯目疊成就害我光明王
請留北斗相北極指揮萬國懸中央此外盡掃除堆積

如山崗贖我父母光當時帝星沒星雨如圻漿似天會
事發叱喝誅姦強何故中道廢自遺今日殃善善惡惡
郭公所以亡願天神聖心無信他人忠玉川子辭訖風
色緊格格近月黑暗邊似有動劍戟須臾癡墓精兩吻
自決抑初露半箇壁漸吐滿輪魄衆星盡原赦一墓獨
誅磔腹肚忽脫落依舊掛穹碧光彩未蘇來慘淡一片
白奈何萬里光受此吞吐厄再得見天眼感荷天地力
或問玉川子孔子修春秋二百四十年月蝕盡不收今

子咄咄辭固合孔意不玉川子笑答或請聽逗遛孔子
父母魯諱魯不諱周書外書大惡故月蝕不見收余命
唐天口食唐土唐禮過三唐樂過五小猶不說大不可
數災沴無有大小瘡安得引衰周研覈其可否日分晝
月分夜辨寒暑一主刑一主德政乃舉孰為人面上一
目偏可去願天完兩日照見萬方土更不瞽萬萬古
與馬異結交詩天地日月如等閑盧仝四十無往還唯
有一片心脾骨巉巖崿崿硤元鬱律刀劍為峰巒平地放

着高如崑崙山天不容地不受日月不敢偷照耀神農
畫八卦鑿破天心胷女媧本是伏羲婦恐天怒擣鍊五
色石引日月之針五星之縷把天補補了不肯歸聳家
走向日中放老鴟月裏栽桂養蝦蟇天公發怒罰龍蛇
此龍此蛇得死病神農合藥救死命天恠神農黨龍蛇
罰神農為牛頭令載元氣車不知藥中有毒藥藥煞元
氣天不覺爾來天地不神聖日月之光無正定不知元
氣本不死忽聞空中喚馬異馬異若不是祥瑞空中敢

道不容易昨日同不同異自異是謂大同而小異今日
全自同異不異是謂全不往兮異不至直當中兮動天
地白玉璞裏斷出相思心黃金礦裏鑄出相思淚忽聞
空中崩崖倒谷聲絕勝明珠千萬斛買得西施南越一
雙婢嬌饒惱殺人凝脂為腰翡翠裙唯解畫眉朱點唇
自從獲得君敲金撻玉凌浮雲却退顧一雙婢子何足
云平生結交苦少人憶君眼前如見君青雲欲開白日
沒天眼不見此奇骨此骨縱橫奇又奇千歲萬歲枯松

枝半半殆壓山谷盤根蹙節成蛟螭忽雷霹靂卒風暴
雨撼不動欲動不動千變萬化惣是鱗皴皮此奇恠物
不可欺盧仝一見馬異文章酌得馬異胷中事風姿骨
本恰如此是不是寄一字

劉義

塞上逢盧仝云直到桑乾北逢君夜不眠上樓腰脚健
懷土眼精穿斗柄寒垂地河源涼徹天羈魂泣相向何
事有詩篇

自問云自問彭城子何人接汝顛酒腸寬似海詩膽大
於天斷劍徒勞匣枯琴無復絃相逢不得合賴是向秋
泉

義節士也少放肆為俠行因酒殺人亡命會赦出更折
節讀書能為歌詩然恃故時所負不能俛仰貴人聞韓
愈接天下士步謁之作冰柱雪車二詩出盧孟右樊宗
師見為獨拜後以爭語不能下賓客因持愈金數斤去
曰此諛墓中人得耳不若與劉君為壽愈不能止歸齊

魯不知所終

楊巨源

春日獻聖壽無疆詞云代是文明晝春當宴喜時爐煙
添柳重宮漏出花遲漢典方寬律周官正採詩碧霄吹
鳳管紅日在龍旗造化膺神契陽和沃聖慈每因隨百
獸率舞奉丹墀

梁貞明三年薛廷珪以
宮漏出花遲為詩題

張弘靖三世掌書命在台坐巨源詩曰伊陟無聞祖韋
賢不到孫時稱其能與張氏說家門巨源在元和時詩

韻不為新語體律務實功夫頗深旦暮吟詠不輟年老
頭搖人言吟詩所致

早春即事呈劉員外云明朝晴暖即相隨肯信春光被
雨欺且任文書堆案上免令杯酒負花時馬蹄經歷須
應遍鶯語丁寧已恠遲更待雜芳成艷錦鄴中爭唱仲
宣詩

送章孝標校書歸杭州因寄白舍人云曾過靈隱江邊
寺獨宿東樓看海門潮色銀河鋪碧落日光金柱出紅

盆不妨公事資高卧無限詩情要細論若訪郡人徐孺
子應須騎馬到沙林

巨源以三刀夢益州一箭取遼城得名故樂天詩云早
聞一箭取遼城相識雖深有故情清句三朝誰是敵白
鬚四海半為兄貧家薙草時時入瘦馬尋花處處行不
用更教詩過好折君官職是虛名巨源後拜省郎樂天
復以詩賀云文昌新入有光輝紫界宮牆白粉闌曉日
鷄人傳漏箭春風侍女護朝衣雪飄歌句高難和鶴拂

煙霄老慣飛官職聲名俱入手近來詩客似君稀

巨源字景山大中時為河中少尹

何事慰朝夕不踰詩酒情山河空道路蕃漢共刀兵禮

樂新朝市園林舊弟兄向風一點淚寒晚暮江平

張為取此

作為主客圖

送裴中丞出使云一清淮甸假朝綱金印初迎細柳黃
辭闕天威和雨露出關春色避風霜龍韜何必陳三略
虎旅由來肅萬方宣諭生靈真重任回軒應問石渠郎

送絳州盧使君云應將清靜結心期又共陽和到郡時
絳老問年須算字庾公逢月要題詩朱欄迢遞因高勝
粉蝶清明欲下遲他日徵還作霖雨不須求賽敬亭祠
送司徒童子云衛多君子魯多儒七歲聞天笑舞雩光
彩春風初轉蕙性靈秋水不藏珠兩經在口知名小百
拜垂髫稟氣殊况復元侯旌爾善桂林枝上得鵷雛
送人過衛州云憶昔征南府內遊君家東閣最淹留縱
橫聯句長侵曉次第看花直到秋論舊舉盃先下泪傷

離臨水更登樓相思前路幾回首舊眼青山過衛州

寄昭應王丞云武皇金輅輾香塵每歲朝元及此辰光
動泉心初浴日氣蒸山腹揔成春謳歌已入雲韶曲詞
賦方歸侍從臣瑞靄朝朝猶望幸天教赤縣有詩人

寄江州白司馬云江州司馬平安否惠遠東林住得無
湓浦曾聞似衣帶廬峰見說勝香爐題詩歲晏離鴻斷
望闕天遙病鶴孤莫謾勾牽雨花社青雲依舊是前途
古意贈王常侍云繡戶紗窓北里深香風暗動鳳凰簪

組紉長在佳人手
刀尺空搖寒女心
欲學齊謳逐雲管
還思楚練拂霜砧
東家少婦當機織
應念無衣雪滿林
贈張將軍云
關西諸將揖容光
獨立營門劍有霜
知愛魯連歸海上
肯令王剪在平陽
天晴紅幟當山滿
日暮清笳入塞長
年少高功人最美
漢壇煙樹日蒼蒼

贈李傳云
知因公望掩能文
誓激明誠在致君
曾罷雙旌瞻白日
猶將一劍許黃雲
搖窓竹色留僧語
入院松聲共鶴聞
莫被此心生晚計
鎮南人憶杜將軍

述舊紀勲寄太原李光顏侍中云玉舍含悽見鴈行
垣新詔拜龍驤弟兄間世真飛將貔虎歸時似故鄉
角因風飄朔氣旌旗映水發秋光河源收地心猶壯
笑向天西萬里霜

又云倚天孤劍截雲孤報國縱橫見丈夫五載登壇真
宰相六重分閫正司徒曾聞轉戰平堅寇共說題詩壓
腐儒料敵知機在方寸不勞心力講陰符

上裴中丞云六年西掖弘湯誥三捷東堂總漢科政引

風霜成物色語回天地到陽和清威更助朝端重聖澤
曾隨筆下多應笑白鬚揚執戟可憐春日老如何

和人與人分惠賜冰云天水藏來玉墮空先頒密署幾
人同映盤皎潔非關露當扇清涼不在風瑩質方從綸
閣內凝輝更備錦帷中麗詞珍貺難雙有迢遞金輿殿
角東

觀打球有作云親掃毬場如砥平龍驤驟馬曉光晴入
門百拜瞻雄勢動地三軍唱好聲玉勒回時霑赤汗花

駿分處拂紅纓欲令四海氛煙靜杖底纖塵不敢生

贈隣家老將云白首羽林郎丁年戍朔方陰天瞻磧路
秋日渡遼陽大漠寒山黑孤城夜月黃十年依蓐食萬
里帶金瘡拂雪陳師祭衝風立教場箭飛瓊羽合旌動
火雲張虎翼分營勢魚鱗擁陣行誓心清塞色闔血雜
沙光戰地晴輝薄軍門曉氣長冠深爭暗襲闕迥勒春
防身賤竟何訴天高徒自傷功成封寵將力盡到貧鄉
雀老方悲海鷹衰却念霜空餘孤劒在開匣一霜裳

酬崔博士云自知頑叟更何能唯學雕虫謬見稱長被
有情邀唱和近來無力更祇承青松樹杪三千鶴白玉
壺中一片冰今日為君書壁右孤城莫怕世人憎

酬盧員外云謝傳旌旗控上游盧郎鐫俎借前籌舜城
風土臨清廟魏國山川在白樓雲寺當時接高步水亭
今日又同遊滿筵舊有笙歌在獨有羊曇最淚流

酬于駙馬云綺陌塵香曙色分碧山如畫又逢君蛟藏
秋月一片水驥鑣晴空千尺雲戚里舊知何駙馬詩家

今得鮑參軍陽和本是煙霄曲願向花間次第聞

又云芳時碧落心應斷今日清詞事不同瑤草秋殘仙
圃在綵雲天遠鳳樓空晴花曾送金羈影涼葉還生玉
簾風長得聞詩懽自足會看春露濕蘭叢

酬裴舍人見寄云誰道重遷是舊班自將霄漢比鄉關
二妃樓下宜臨水五老祠西好看山再葺吾廬心已足
每來公府路常閑詩陪亞相逾三紀石笥煙霞不共攀
酬崔駙馬惠牋百張兼貽四韻云百張雲樣亂花開七

字文頭艷錦回浮碧空從天上得殷紅應自日邊來捧
持價重凌雲葉封畧香深笑海苔滿篋清光應照眼欲
隨凡韻輒徘徊

元微之憶楊十二詩云楊子愛言詩春天好詠時戀花
從馬滯聯句放盃遲日映含煙竹風牽卧柳絲南山更
多興須作白雲期

巨源善叙事胡二十以戶部判度支乃賀以詩曰雄拜
知承聖主恩於是有雄拜之目

陳羽

羽湘妃云二妃哭處雲沉沉二妃怨處湘江深商人酒
滴廟前草蕭颯風生斑竹林

雪詩云千門萬戶雪花浮點點無聲落瓦溝全似玉塵
消更積半成冰片約還流光含曙色清天苑輕逐微風
繞御樓平地已霑盈尺潤年豐須荷富人侯

宴楊駙馬山亭云垂楊拂岸草茸茸綉戶牕前花影重
鱸下玉盤紅縷細酒開金甕綠醅釀中朝駙馬何平叔

南國詞人陸士龍落日泛舟同醉處回潭百丈映千峰
贈人云或棹孤舟或杖藜尋常適意釣長溪草堂竹徑
在何處落日孤煙寒渚西

題夫差廟云姑蘇臺上千年木刻作夫差廟裏神冠蓋
寂寥塵滿坐不知簫鼓樂何人

韓退之有落葉送羽云誰云少年別流淚各需衣羽與
退之同年登第

羽夜別溫商梓州云鳳凰城裏花時別元武江邊月下

逢客舍莫辭先買酒
相門曾忝舊登龍
迎風騷屑千家竹
隔水悠揚午夜鐘
明日又行西蜀去
不堪天際遠山重

春園即事云水隔羣物
外夜深風起頻霜中
千樹橘月下五湖人
聽鶴忽忘寢見山如
得隣明年還到此共
看洞庭春

送戴端公赴容州云分
命諸侯重歲蕤繡服
香八蠻治險路千騎
踏繁霜山斷旌旗出
天晴劒佩光還將小
戴

禮遠去化南方

送友人及第歸江東云五陵春色泛花枝
心醉花前遠別離落第耻為闕上客
成名空羨里中兒都門雨歇愁分處
山店燈殘夢到時家住洞庭多釣伴
同來相賀話相思

小江驛送陸侍御歸湖上山云鶴唳天
邊秋水空荻花蘆葉起西風今夜渡
頭何處宿會稽山在月明中

王履正

異方霑瑞氣千呂見青雲表聖興中國來王謁大君迎
祥殊大樂叶慶賴橫汾自是明時起非將觸石分映霄
難辨色從吹作成文須使流千載垂芳在典墳

青雲
千呂

履貞元七年青雲千呂詩登第

彭伉

聖布中區化符祥異域雲含春初應呂暈碧已成文東
起隨風煖西流共日曛升時嘉異月為慶等凝汾輕與
晴煙比高將曉霧分飄飄如可致願此翊明君

伉貞元七年杜黃裳下試青雲干呂詩登第伉宜春人
既登第伉妻族有湛賁者猶為郡吏伉妻即湛姨也妻
族賀伉坐皆名士伉居客右一坐盡傾而賁飯於後閤
其妻責之曰男子不能自勵窘辱如此復何顏賁感其
言力學一舉擢第貞元十二年第伉方郊遊聞之失聲墜驢袁
人譔曰湛郎及第彭伉落驢至今袁州之西有落驢橋

辛弘智

弘智國子監進士賦詩曰君為河邊草逢春心刺生妾

如臺上鏡得照始分明同房常定宗改始字為轉字遂
爭之皆云我作乃下牒見博士羅道琮判云昔五言定
表以理切稱奇今一言競詩取詞多為主詩歸弘智轉
還定宗以狀牒知任為公驗

歐陽詹

字行周泉州人初見拔於常袞後見知於退之元賓終
於四門助教李貽孫序其文曰君之文周詳切於情故
事叙重複宜其掌代文柄以變風雅一命而卒天其絕

乎子價早死孫解

銅雀妓云蕭條登古臺迴首黃金屋落葉不歸林高陵
永為谷粧容徒自麗舞態閑誰目惆悵總帷前歌聲苦
於哭

晨裝行云村店月西入山林鴉鵲聲旅裝徹夜席束囊
事晨征寂寂人尚眠悠悠天未明豈無偃息心所務前
有程

蜀中將歸留辭韋相公云寧體即雲構方前恒玉食貧

居豈及此要欲懷歸憶在夢關山遠如流歲華逼明晨
首鄉路迢遞孤飛翼

翫月詩序云月可翫翫月古也謝賦鮑詩朧之庭前亮
之樓中皆翫月也貞元十二年歐閩君子陳可封遊在
秦寓于永崇里華陽觀予與鄉人安陽邵楚萇濟南林
蘊潁川陳詡亦旅長安秋八月十五夜詣陳之居修廡
翫事月之為翫冬則繁霜大寒夏則蒸雲大熱雲蔽月
霜侵人蔽與侵俱害乎翫秋之於時後夏先冬八月於

秋季始孟終十五於夜又月之中稽於天道則寒暑均
取於月數則蟾兔圓況埃壒不流大空悠悠嬋娟徘徊
桂華上浮昇東林入西林肌骨與之踈涼神氣與之清
冷四君子悅而相謂曰斯古人所以為翫也既得古人
所翫之意宜襲古人所翫之作月詩云八月十五夕舊
嘉蟾兔光斯從古人好共下今宵堂素魄皓孤凝芳輝
紛四揚徘徊林上頭泛灩天中央皓露助流華輕風佐
浮涼清冷到肌骨潔白盈衣裳惜此苦宜翫攬之非可

將含情願廣庭願至沉西方

途中寄太原所思詩云鷗鳥漸覺遠迴頭長路塵高城
已不見況復城中人去意自未甘居情諒猶辛萬里東
北晉千里西南秦一履不出門一車無停輪流萍與匏
繫早晚期相親或曰詹遊太原悅一妓將別約至都相
迎故有早晚期相親之句妓思之不已得疾且甚乃刃
其髻藏之謂女弟曰歐陽生至可以為信又作詩曰自
從別後減容光半是思郎半恨郎欲識舊來雲髻樣為

奴開取縷金箱絕筆而逝及詹至如其言示之詹啓函
一慟而卒孟簡賦詩哭之序云穆玄道訪予常嘆其事
玄道頗惜之

焦郁

白雲向空盡云白雲生遠岫摇曳入晴空乘化隨舒卷
無心任始終欲銷仍帶日將斷更因風勢薄飛難定天
高色易窮影收元氣表光滅太虛中儻若從龍去還施
濟物功

春雪詩云散漫天涯色承春四望平不分殘照影何處
斷腸聲繚繞光經塞霏微勢逐城因風低未歛帶雨重
還輕千呂知時泰如膏候歲成小儒叨盛世無以答皇
明

袁高

字公碩滄洲人恕已之孫慷慨有節尚為給事中德宗
將起盧杞刺饒州詔出高執不下帝慰曰朕唯卿言切
至已如奏憲宗時卒贈禮書

禹貢通遠俗所圖在安人后王失其本職吏不敢陳亦
有姦佞者因茲欲求伸動生千金費日使萬姓貧我來
顧渚源得與茶事親忙輟耕農耒採採實苦辛一夫旦
當役盡室皆同臻捫葛上歌壁蓬頭入荒榛終朝不盈
摘手足皆鱗皴悲嗟遍空山草木為不春陰嶺芽未吐
使者牒已頻心爭造化力走挺麋鹿均選納無晝夜搗
聲昏繼晨衆工何枯槁俯視彌傷神皇帝尚巡狩東郊
路多堙周廻遶天涯所獻愈艱勤況減兵革困重茲困

疲民未知供御餘誰合分此珍願省忝邦守又慙復因
循茫茫滄海間丹憤何由申右高所賦茶山詩也案唐
制潮州造貢茶最多謂之顧渚貢焙歲造一萬八千四
百斤大歷後始有進奉建中二年高刺史進三千六百
串并詩此一章刻石在貢焙故杜鴻漸與楊祭酒書云
顧渚中山紫筍茶兩片此物但恨帝未得嘗實所嘆息
一片上太夫人一片充昆弟同歡開成三年以貢不如
法停刺史裴充官

唐詩紀事卷三十五

欽定四庫全書

唐詩紀事卷三十六

宋 計敏夫 撰

黎逢

閻濟美

裴交泰

劉皂

黎逢

小苑東望宮池柳色詩云上林新柳變小苑暮天晴始
望和煙密遙憐拂水輕色承陽氣暖陰帶御溝清不厭
隨風弱仍宜向日明垂絲遍閣榭飛絮觸簾旌漸到依
依處思聞出谷鶯

韋蘇州任京兆功曹日有答貢士黎逢詩云彌月曠不
接公門但驅馳蘭草忽有贈持用慰所思不見心微密
況當相見時

逢氣貌山野及第年初場後至便於簾前設席主司異
之誚其生疎必謂文詞稱是專令人伺之句句來報初
問云何人徘徊曰亦是常言既而將及數聯莫不驚嘆
遂擢第

逢登大歷十二年進士第

閻濟美

濟美大歷九年春下第將出關獻坐主張謂詩六韻曰
謬王臣直文明雅量全望鑪金自躍應物鏡何徧南
國幽沉盡東堂禮樂宣轉令遊藝士更惜至公年芳樹
歡新景青雲泣暮天唯愁鳳池拜孤賤更誰憐謂覽之
問失第之因具以實告謂深有遺才之嘆乃曰所投六
韻必展後效明年濟美自江東繼薦就試東都謂復主
文雜文已過繼欲帖經濟美辭以不能謂曰禮闈故事

亦許作詩贖帖遂命天津橋望洛城殘雪題濟美曰新
霽洛城端千家積雪寒未收清禁色偏向上陽殘既而
日勢已晚詩未就謂云只據見在將來一覽稱賞遂唱
過盧景莊謂曰前足下試蜡日祈天宗賦以魯丘對衛
賜則子貢也乃作駟字誤矣方悔之明日謂曰天寒急
景諸君文卷不成未可以呈宰相請重錄送納既而索
舊卷則駟字上朱點在焉易卷之意蓋有在也到闕謂
揖濟美曰前日春間遺才所投六韻不敢暫忘幸副素

懷矣濟美紀其事曰前朝公相許與定分一面不忘美
哉

濟美貞元末歷福建觀察為治簡易以工部尚書卒

濟美元和初刺華州劾華陰令柳澗賊罪韓愈使過華
上疏理澗留中不下詔御史按得澗賊狀以愈妄論復
為國子博士

裴交泰

長門怨云自閉長門經幾秋羅衣濕盡淚還流一種峨

媚明月夜南宮歌吹北宮愁范攄曰近日舉場詩尤新
章孝標對月云長安一夜千家月幾處笙歌幾處愁有
類乎裴交泰交泰正元間詩人

劉皂

長門怨云宮殿沉沉月色分昭陽宮漏不堪聞珊瑚枕
上千行淚不是思君是恨君

皂正元間人也

韋莊載皂長門怨云淚滴長門秋夜長愁心和雨到昭

陽淚痕不學君恩斷拭却千行更萬行



唐詩紀事卷三十六